

Koliti Vegenalitini Luhuva Nampa 2 Pauló Gizo Kimimó

Koliti vegená nónohá kimike gizo kimi gakó

1 ¹ Neza Ómasímini agepagú gakotó Izesu Kilistoni aposolo loló u ve Paulona itó ve ligiveteho Timotí ezagi makó minusike Koliti numutoka Ómasímini vegenala zuha itó Akaia mikasi lugáaloka monó gele vegená miniliki viki iki inamó lekeza luhuva netá imane gizo nolukumuke láa loko noluve: ² Ameteho Ómasi itó Guivahani Izesu Kilistó aitokatí nasahilí itó hulu nene lekelitoka minoloko voko minino.

Pauló milumámini amupiló minake Ómasi agepoka limó

³ Guivahanite Izesu Kilistoni amelahini Ómasi agepoka litunize. Eza hulu ameteho itó lelémo geha zeaká ameteho minokave. ⁴ Eza milumámini mogonáa haitopaitó utó noigo lelémo guni oaká noive. Lá okago, Ómasímo lelémo hulu oaká noi hulu nenémo leza ámina oko ligive lugáa miluma malumámini amupiló niminikoma kelémo geha zitunimó onoive. ⁵ Kilistó eza miluma gilimó nenémini nekisáa lelitoka vaí oko miní amekago, ámina oko Kilistoni huluváa genavagi ale utó moloaká nousive. ⁶ Helegaloka lelitoka miluma maluma utó oaká noimó nene lekelitoka geha utó itive loko itó lekelémo lamaná itive loko utó o lemeaká noive. Itó helegaloka hulu nenémo utó o lemeaká noimó nene lekelikumule loko utó o lemeaká noive. Itó hulu nenémo lekelitoka mino moloko hize lé noleketiko, miluma maluma lelitoka utó oaká noimó ámina oko lekelitoka utó noiko nene siti viziki miniki alitave loko neve. ⁷ Itó leza lekelikumú lagata losi gelemoko minoaká nounimó nene alévolé okago láa loko geleaká nounge: Leza miluma geleaká nounimó nene lekezagi izá miliki miluma maluma giliki niminiki hulúmini gehava monéna alitave.

^a 1:1 Apo 18:1

^{8b} Nigivénegita, nenémimi gakola makó láa loko neve: Asia mikasigú milumámimi amupiló minomo iteháma neve. Nenémú lakagatí molokative loko litoze, gililo. Neneloka nene genavagi netá golivagi lamaná lumupiló iteake lelémo akatimó okago, miní ameko logómula gizative loko ma gelemuháma neve. ⁹Itó imane heleaká netá ale alitokune lokunike ligikate golosasa gimó nene lá imóza, ma utó o lememimóma neve. Leza zámuzatemú gelekuko lemeko ha netá loló okiko, Ómasímo heleakakutí lelémo oteaká ve aitokagó leheta itune loko ámina golivagi netá utó o limimóma neve. ¹⁰Itó áisi nene heleakakutí alata mololetoko minamó. Itó áisi minoko goha alata mololetoloko vinogo ive. Nene gakó gele seketigí o minoko aitoka leheta okune. ¹¹Itó lekeza Ómasiloka litatímó lelémo vatí iko, Ómasi eza agika lamanaki vémove loko lokonotó aleko lugutó vizekiko, vejená mukilite kegepagutí kegepagutí lelikumú Ómasi agepoka liki geké litiki minatave.

**Pauló Koliti vejenatoka vinogo noike haitó
agata gilimó nenémimi mogonáa**

¹²Lezatemú gulusigo lagasó iteaká noimó nene lá okomú neve: Ligika lamanatotí itó monokú nene imane mikasiuka nominuko ligikámo netá makokumú lehelé osá amive. Leza monóini nomi vejená keí kovogisaló nenémimi oko minunike monó gilina vejená lekélí lokovogisaló etó oko vevesoko minoaká nune. Itó monóini nomi vejenalite gili hee likakató leheta o minoko nomive. Ómasímimi nasahilitó voko leheta oko minoaká nune. ¹³⁻¹⁴Neza gakó soza sazagi loko nomive. Gakó mogonatagana ma hitosá amuve. Luhuva gizo lekemekugo gatiki gili guni itave lokogó gizoaká nouve loko gelenouve. Itó lekeza není mogona lugáa mota gilinamómáminiki lekeza alika gili hee liki gili asú itave loko noguluve. Lá ikiko, lekelikumú neza gulugo iteaká noimó nenémimi oko lekeza Guivahani Izesuni gamena napaló nenikumú giliko ititize.

¹⁵Gakó láa loko nolumó nene gele alévolé okuke goí oko gamena lositá lekelitoka vitomó nenémo mulutikú lamaná gilitave loko ale vavá umó. ^{16c} Itó voko ángolikimikinake Masetonia mikasiuka voko minokinake goha nene atiginá oko lekelitoka okugo nilími gapo iki niko Zutaia mikasiuka vitohe loko gulumole. ¹⁷Itó neza láa loko lokugo, vávani oko haitolímimi imómave liki nilahe, olile. Itó neza nene monóini nomi vejenakitana oko nene negepatunú vitove loko lo muluke ámina gamenaló nene nigikatunú óe vavitove loko lumó nene hutuva loló okahe. ¹⁸Ómasi eza lamanalímimi amelahináa minoakeve loko gakó lo hukoko lo lekemekugo hutuváa itó gihiláa nene gamena hámakó utó onamive. ^{19d} Ómasímimi gipala Izesu Kilistoni mogonáa nene nezagi itó

^b 1:8 1 Koli 15:32 ^c 1:16 Apo 19:21 ^d 1:19 Apo 18:5

Sailasí itó Timotí leza lo lukumuhá vemámo gakó lo molokago lugáa nene gihiláa loló oaká noigo lugáa hutuva loló osá amive. Mukí gihiláagó loló oaká noive. ²⁰Ómasímo lo mololeta gakó haitopaitolímíni nene aitokagó gihila zeaká noive. Nenemú Ómasímíni luhuva gegemá oko minative loko Izesú lelémó vatí noigo Ómasi agepoka lokusike lamanale loko loaká nousive. ²¹Ómasímo lekezagi Kilistotoka lelémó molokago alévolé okune. Itó Ómasímo lelémó etó onoimóma neve. ²²Itó áisigó nene ligikagú anosa mololetamóma neve. Itó netá mukí alika lehizeletatítímíni izaina ike nene Sikalahú mulutegú molokago noimóma neve.

²³Neza numutitoka voko gahá lekemeko lekelémó gopa okatove loko gulugo, gena okago, lekelitoka goha vamumóma neve. Gakó nene nigikagú ániagoaká ve Ómasímo gelekago lamaná lo nolukumuve. ²⁴Itó lekeza gili alévolé iakatinigú alévolé iki niamó nene gelenousimó nenazo, leza monokú lugulizaki ve loló itíive loko ma lamuve. Hanuva lekelitoka mulutikú lamaná gilitave loko lekelémó vatí oko hozaváa aleaká nousive.

2 ¹Miluma gilita netá goha ale utó mololikimikatove loko gulugo, gena nivisekago, lekelitoka vamtive loko nigikatunú lo hukokuve. ²Nénisi miluma netá lekemekugoma, makó éage mulúnégú ali lamaná initatave. Lekelisigó nianazo, mulutikú golesa gilíkiko lá amitamó ikatave loko nenémíni aminogo uve. ³Itó lekezatini netá matá aliaká amó ali hee litave loko luhuva netá makó gozapá gizo lukumumó nene lekelitoka vokugo, lekeza mulúnégú ali lamaná inimiaká niamómata goha mulúnégú ale golesa gilito netá alinimikatave loko nene ámina luhuva gizumóma neve. Lezatemú láa loko noguluve: Není mulúnégú lamaná gilitotímó monéna mulutikú lamaná geleaká netá ale utó mololeketanogo ive. ⁴Itó mulúnégú ale golesa gelekago itó mulúne gitihiná okago, lekelikumú ive napa napa uke luhuva netá gizo lukumumó nene mulutikú golesa oleketatove loko negopa, nigikáne lekelitoka alévolé oko mulumó nenémíni mogonáa lekelepizitove loko ámina luhuva gizumóma neve.

Goesa netá ali vémini lihima ahulitata gakó

⁵Ve makokumú luhuva netá gizumó áisi nene mulutegú golesa guluni netá alimó nene nenikó ma onetamive. Lekelikutí lugáagi mulutikú golesa gele netá alimóma neve. Ale nupa oko lokugo gena okative loko mukí vejená nenémíni oletamóma neve loko lamuve. ⁶Lekeza mukilita ámina ve nene nogosani amiki netá matá ali hee liki lilí itamó nene mota áminaló asú ino. ⁷Itína nene mulunagú golesa gelekoko monéna golesa okative loko lihimavala ahulitiki alími hulu ilo. ⁸Nenemú alími vatí iki nasahilí i amiiki likigikámíni mogona alapizitave loko lakagata aleko noluve. ⁹Neza nenemule loko goí oko luhuva netá gizo lekemenoumóma nene gakónéa mukí gili alitahe loko nenémíni mogonáa utó itive loko gimilikú moloko gizo lekemenoumóma neve. ¹⁰Lekeza ve makolímíni

lihimala ahulimikago, neza ámina oko ahulomiaká nouve. Áisi lihima ale utó molamó nene nezagi ale utó molonetamó negoma nene nezagi nahulotuve. Satá nene netá golesa aleletatove loko nogilimoláa mota gelenounimó nenazo, nenemú lekelikumú guluke Kilistoni avogisaló nene ¹¹Satá eza logoka vizeko livilegekative loko ámina vémini lihima ahulomiaká nouve.

Pauló Toloa apatóka minake agata gululusi gili gakó

¹²e Neza Kilistoni gakó lamaná litove loko Toloa numutoka nanitugo, Guivahanímo gapova ale lologa molonimikago, gelekuke, ¹³nigivéneho Taetasi eza lekelitokatí litá oko atiginá oko amigove loko vitagá okuke nagata gululusi geleuke lekeza mota minalo lokuke Masetonia mikasiuka vumóma neve.

Kilistoni anuvaváa noune

¹⁴Kee, Ómasi eza Kilistotoka lelémo gímizeakeve loko aí gala veva gamena gamena kivilegeaká noikumú agoliza vizeko ganini hizeaká noive. Lá oake gala vizekago, aí mognámíni anuva lamaná lagámíni nene sénava segekuko hutílí oko numutó namató hutílí oko novimó nenemú geké lotinake logoliza vize amitune. ¹⁵Leza Kilistoni anuvaváa lamanakitana nouhatita Ómasi guguni gizo amekago vegená kugutó vizeakalímíni mututoni itó lapuluva oakalímíni mututoni nene anuva kepeleaká noive. ¹⁶Lapuluvámíni mututoni lilí inamó keza gelelehá i ahulikago limiki hiliaká nenémíni anuváa kepelekago hiliaká niave. Itó lugutó vizeakalímíni vegenala leza gelelehá okuko lemeko alévolé oko minoakalímíni anuváa lepeleake lelémo mómoká okago, gosohá lemetameki loló oko minoaká noune. Lelí hozámíni mognáa lá oko nenazo, hoza nenémínaa éagama kezáini zámuzáinitunú alikiko hee hee litive. ¹⁷Lelikitana minata vegenalitegó lá itamó neve. Leza vegená lugáate iki miliki iaká niamó nenémíni osá amune. Vegená lugáa mukilite Ómasímíni gakokumú gelego, moni ale utó oketati netá loló okago, hozaváa aliaká niamóza, leza nene Ómasímo limiselekago ligikagú vové avé lo minago minoko Ómasímíni avogisaló voko Kilistotoka gímizekunike monola loaká noune.

Gosohá lo múnahéaká gakolímíni hozaváa aleaká noune

3 ¹Láa loko nolumó nene lelí lugulizate ale otitíive loko gakó nenémínaa goha apí usimó nehe. Itó lekeza lelí mognatemú gilitave loko vegená lugáate luhuva netá makó giziki lelí lugulizá ali otiki lekelepizitahe. Itó lelí mognamú ali otiiki lekeza makó giziiki vegená

^e 2:12-13 Apo 20:1

luhuva netá makó kelepizitahe. ²Nenémínoko nomive. Není hozanémini luhuva nene lekelisi niave. Itó luhuva gizoaká netá nene ligikagú luhuva gizokago, vegená mukitoka ángigiki gatiki giliakalímini nene neve.

^{3f} Leza lekelitoka hoza alekusigo lekeza Kilistotokatí luhuva netá lilí ikago, nenémini mogonáa utó oko neve. Itó luhuva gizoaká netá nene nagamitunú gizamive. Alévolé oko minoaká Ómasímini Sikalahulímo luhuva gizamó nene Mosé lo mola gakó gehaniló luhuva gizamómámini oko negopa, likigikagú luhuva gizokago alévolé oko neve.

⁴Lelí mogonatemú gakó némináa nene Kilistokumule loko Ómasiloka leheta nousike lo lekemeaká nousive. ⁵Hoza gihiláa makó lezatelokatí utó oaká noive loko itó lezate zámuzatelotí neve loko nomive. Netá matá loló okusigo lamaná oaká noimó nene Ómasilokatikó nene neve. ^{6s} Ómasi áisi nene lelémo vatí okago gosohá lo múnahéaká gakolímini hozaváa aleaká nousive. Li huka gakó luhuva gizamó nene gele aleakalímini hozaváa negopa, Sikalahú gele ameakalímini hozaváa neve. Li huka gakó luhuva gizamó nenémo lemeni heleaká netá ale utó mololimiaká noive. Itó Sikalahú nenémo alévolé lemetameki minoaká netá nene ale utó mololimiaká noive.

^{7h} Itó Mosé lo hukoko li gakó nene litaha ligika lapuluva oaká ale utó moloko voakalímini nene gatapa geható luhuva gizamó nenémo gopa Ómasímini lapanalagi utó imole. Itó ámina lo hukoko li gakolímini lapaná nene minoko tolova imóza, Moseni avogisaló ámina lapaná nenémo napaló nego, Isilae vegená keza neneló anitiki agoka agepaló ángigamitamó imóma neve. ⁸Monó lithámini lapanaláa nenémínoko minamó nenazo, Sikalahulímo monó gosohá lehezéliamiaká noimó nenémini lapanaláa aleko iteko sipisi minanogo ive. ⁹Ligika lapuluva oakalímini mututonáa voaká nenémini lo múnahéaká gakolímini lapanaláa nene lemekosí neve. Itó lihimate asú olimikago minoaká nenémini hozavámini lapanaláa nene iteko neve. ¹⁰Itó litaha lo múnahéaká gakolímini lapanaláa nene Moseni agoka agepaló utó imóza, gosohá lo múnahéaká gakolímini lapanala napa nenémo zemikago lovoza helekave. ¹¹Netá voko haha inogo itímini lapanala nene napa otigí utó imó nenazo, netá minoloko voko mino lúaló moloaká nenémini lapanaláa nenémo iteko sipisi neve.

¹²Lagata losi gelemoko ageva oaká nouni netá nenémínoko minokanazo, monó gakóma lehelele vizemigo vávani oko lo kemeaká nounge. ¹³ⁱ Lá nounike Mosenigitana minamune. Aí avogisaló Ómasímini lapaná sata ominamó nene asú inogo noigo, Isilae vegenalite iki ángigikatave loko agoka agepaló gánoni ge hitoake minoaká imóza, gosohá lo múnahéaká gakolímini lapaná nene ze hitosá amune. ¹⁴Itó

^f 3:3 Gá 24:12; Zel 31:33; Izi 36:26 ^s 3:6 Zel 31:31 ^h 3:7 Gá 34:29 ⁱ 3:13 Gá 34:33

kigikáini hize lí okago, minoloko voko itína lo múnaheaká gako litaha nenémo goha asapulagi loló okago, keza nagatiki gili hee liki gilisá amave. Itó asapú nene ezáa hanuva ma vinasaminogo ive, Killistó hámakó vinasoko ale vesamá oaká noive. ¹⁵Keza itína gamena nene Moseni luhuva gako gatiaká niago kigikagú asapulagi ha minoaká noimóza, ¹⁶kigikáini ali viligiki Guivahaniloka kovogisa i amitamó nene asapúma vinasoketanogo ive. ¹⁷Guivahanimú nolumó nene Sikalahukumú noluve. Itó Guivahanímini Sikalahulámo minoaká noitoka netá makolímo nagá oletosá amive. ¹⁸Leza nene lovogisate aitoka asapuláa minamitimó neve. Nenemú Guivahanímini lapanalámo hize hanatolimikoko lelémo viligokago, Ómasímini ametamenigi aleloko novunimó nene Guivahanímini Sikalahulímo lá oaká noive.

Lugupe nene mikasi somogitana neve

4 ¹Guivahani eza nasahililagímo hoza nenémináa loletamó nenazo, nenemú goselekaselé amitunize. ²Láa nounike, avozavagi netá itó asugunatoka aleaká netá nene lemegesa amekunike, makó sozámini amupiló minoko Ómasímini gako ale gopa oaká nene ma osá amune. Leza Ómasímini avogisalo monó ale akutoko lo utó moloko lo nokumuko vejená mukilite lelí mogonate gilikago hee lokogó neve. ³Itó monó gako lamaná loaká nounimó nene asapulagi nolumó geleaká noikoma, lapuluvámini mututoni lilí ina vejenatokagó asapulagi nolumó geleaká noive. ⁴Monó gili ahuliaká niamó kéisi nene imane mikasigutí agulizaki ve nenémo kigikáini hize lí okago, nana iki gako lamanalímini lapanalímo kigikagú lemekiko Kilistó eza Ómasímini avevezahaló oko nomina vémini luhuváa ániagi hee liki ániatave. ⁵Leza monó nolunike lezatemú lo lekemesá amusive. Izesu Kilistó eza lelí Guivahanive itó Izesukumule loko gelekelé izegipatini mukitoka loló oko minatíive loko lo lekemeaká nousive. ^{6j}Ómasi eza gozapá mogonaloka límugusi zeake nego gó lozo loko lokago gó lamó. Itó áisigó nene lokago ligikagú monolímini lapaná utó okago Kilistoni avogisalo Ómasímini lapaná utó o lamaná okago ániogaká nounge.

⁷Itó ámina monó meinaváa iteko minamó ale minoaká nouni vejená leza nene ámina monó lo nokumuko lugupémo nene mikasi somogitana alévolé onamigo ámina monolímini zámuza lelitoka negopa, Ómasilokatí noimó nenémini mogonáa utó oaká noive. ⁸Miluma malumámini amupiló nominuko nenémo lelémo zeko lana osá amive. Itó lagata losi gelenounike gopa nene guluko gopa osá amive. ⁹Gopoguni netalímini amupiló nominuko, gopa nene ametehe taiza oletosá amive. Galaná mililitiki lá niago, gopa ma heleko lapuluva osá amune. ¹⁰Nenéminoko

^j 4:6 Apí 1:3

Izesú minoko aleko oakalímíni agikaváa ámina oko lugupeloka utó itive loko lugupeloka Izesuni apili hele ametameni nene aleko mohona oaká nune. ¹¹Vegená keza Izesukumule liki lelí gamena gohalagú imi aniti aniti iki lilími gopa napa iki heleakakú lilími miliaká niamó nene Izesú minoko aleko oakalímíni zámúza nene heleaká lugupeloka utó o lamaná itive loko nenéminoko utó o lemeaká noive. ¹²Lá okago, lelitoka heleaká netalímo hozaváa aleaká noive, itó lekelitoka alévolé oko minoaká netalímo hozaváa aleaká noive. ¹³^k Monó gotolaú luhuva gakó makó nene neza Guivahanimú gele alévolé oaká nounazo, monó loaká nouve loko gizonaimóma neve. Itó leza ámina lelegító Sikalahulímo lelémo vávani igo Guivahanimú gele alévolé oaká nounike monoláa loaká nune. ¹⁴Lá unike Guivahani Izesuni heleneikutí alémo oti vémo lezagi ámina oko Izesugegi helenosakutí lelémo otekoko lekezagi monéna aitoka lelémo molanogo ive loko geleaká nune. ¹⁵Ámina genavagi netá nene lekelikumule loko geheaká nounimó nene Ómasímíni nasahilí ohunavagi nenémo hutilí oko novíko, vegená mukilite giliiki Ómasi agepoka liki niviki kogoliza vizi namíko, Ómasímíni lapaná utó oloko voko minative loko neve.

Gutá apató minoko aleko oaká gakó

¹⁶Leza nenemú láa loko gelekunike goselé ma osá amune. Lugupete gisulupa moloaká noimóza, gamena gamena ligika nene ale gosohá oaká noive. ¹⁷Mikasiuka miluma maluma koma geleaká nounimó itó alika monéna asú itimó nenémo gonanalisi napa itó genavagi itó alévolé oko minoakalímíni nene ale utó mololetanogo ive. ¹⁸Itó ánigoaká nuni netá nene asú itimó neve. Ánigamuhá netá nene alévolé oko mino lúaló moloko minatimó nenazo, netá genavagi alilimiaká niamó nenémo negopa, asuguná netá utó o limiti netatoka gonú ominoaká nune.

5 ¹Leza láa loko geleaká nune: Mikasi lugupe sikalahutémini gá numunáa lukokikoma Ómasímo okulumakú alévolé numuni makokitana gosohá lugupe ale utó mololetonoimó nene kigizanitunú gemamó hanuva alévolé oko minati numuni apá neve. ²Itó leza nenemú okulumakú numuni hize lelepizitive loko lagaváa gelekunike amúza nomulunike hanuva lugupegi minoaká nounikeve loko lege zeko minoaká nune. ³Sikalahute zapakó minokative loko okulumakú lugupe ale luhokuko lamaná itive. ⁴Imane mikasiuka gó numukú noinake miluma geleko gena liviseká liviseká noigo, lege zeko minoaká nune. Leza luhoaká gote litaha nene monéna vizako ahulatune loko gelesá amune. Litaha gó ha neiko amupiló gosohá netá ale luhaturune lokogó geleaká nune. Lá okunike heleakalímíni mututoni loló unimó nene alévolé oko

^k 4:13 Age 116:10

minoakalímo mikilí itive loko geleaká noune. ⁵Ámina netá lamaná utó o limitive loko ale vavá oletamó nene Ómasi áisi nenegó noive. Ámina netá lehizeletatimómámini izaina nene Sikalahú lehizeletamó neve.

⁶Leza gosohá lugupe alitunikumú guluko mulutegú ale gilitolimikiko minatunize. Lá noinake láa loko nene gilitunize: Mikasi lugupegi minoaká nuni gamena nene Guivahanimú vitagá unike gutá mikasiloka minoaká noune. ⁷Itína gamena nene gele alévolé okogó minoko aleko oaká noune. Gihiláa nene velesá ánigonamune. ⁸Láa noinake gopa mulutegú ale gilitolimikago minoaká nounike lugupetunú gutá mikasiló minoaká nene ahulokinake gotó apatoka Guivahaniigi makó minosakumú lagaváa geleaká noune. ⁹⁻¹⁰¹Nenemú láa loko gelenoune: Lugupegi minoko netá matá oko moloko unimó lamaná nehe itó golesa nehe nenémini lelegí oko etó etó oko apasoko limitive loko leza mukitó minoko Kilistoni lo hukoaká holomaló vo anitinogo unimó nenazo, nenemú minoaká nene imane mikasiloka gutá lugupegi minoaká ahe itó mezane gotó mikasiloka minatunimó ahe nene Guivahanímo giliko lamaná itive loko legesó oko minoko aleko oaká noune.

Ómasímo ale geha zelimikiko ezagi apizituni gakó

¹¹Guivahanimú lehelele vizigo minoakalímini mogonamú gelekunike vejená keza kigika ali viligatave loko kagata aleko lo kemeaká noune. Ómasi eza mogonate ángoaká noive. Itó lekeza áminámini iki mogonate nene likigikatunú giliaká niave loko noguluve. ¹²Leza láa loko lokuko, gilikiko, leza nene miní ameko lugulizá ale otinogo gakó lo nolukumuhá gelemino. Lekeza hanuva lelikumú giliko, itekiko, lekeza vejená lugáa kigika otopá zemiko miniki kugupémuni netakumukó hokolizá iki miniaká niamoláa nene není mogonamú li kimikiko gili lamaná itave loko noluve. ¹³Lelikumú negi ve liki nilamóma nene Ómasímini hozavamule loko loló ino. Itó ligikate hee lokogó neve liki nilamó nene lekeza monotinigi itave loko loló ino. ¹⁴Ve hamó eza vejená mukikumule loko helekamó nenazo, leza mukitó monéna ezagi helenouhá geleneive loko gele zagunikeve loko Kilistó eza agika lemeaká noitímo lelémo gikitokago lezate lugupe aleko itesá amune. ¹⁵Itó vejená mukikumule loko hilimó nene logómulagi nomininake lezatemukó minoko aleko aminake lelikumú heleake oti vemule loko minoko aleko itunize.

¹⁶Nenemú lá oko logómulagi minatuni gamenaló vejená kugupegi kemetamenigigó ángokinake mogonataganáinimú lo hukoketaminogo une. Itó Kilistoni ámina oko gozapá agupegi ametamenigi ángokunike eza lelikitana ve noive loko gulunimóza, ámina avevezahaló itínasa nene goha ma lá aminogo une. ¹⁷Nenemú vejená makó Kilistotoka

¹ 5:10 Lom 14:10

gímizinitamó kéisi nene haitolímini lilí iki ninigave. Litaha netáini nene asú okimikago gosohá mogonáa utó o kemekave. ¹⁸Ámina netá matá gihiláa nene Ómasilokatí neve. Áisi nene Kilistoni zámuzaló lelémo apizekago nonagá okunike vejená lugáa nene ámina kelémo nonagá iti gakó li kimitave loko loletamóma neve. ¹⁹Ámina gakó láa loko neve: Ómasi eza Kilistotoka minake mikasiuka vejená lezagi ale geha zeletamó. Lá oake lihimate ahulolimiake goha gatoaká nene gatosá amive. Itó ale geha ze limiaká gakó nene holutejú hize oteletamóma neve. ²⁰Nenemú leza Kilistoni gakó lole ale ve minusike Ómasímini gakó lamaná nene mololimikago, lo lekemeaká nousi gakó nene Ómasímo lo likimímó gelekago nene, Kilistokumú gelenousike lakagata aleko láa loko lo lekemeaká nousive: Ómasímo ale geha zelikimikiko ezagi apizilo. ²¹Kilistó eza lihima ma alemi ve nene Ómasímo lelikumule loko golesa netategi loló otamó nene leza Kilistogegi apizekinake Ómasímini avogisaló hee loko minatune loko nenémini imó neve.

6 ¹Ómasi alémo vatí vatí ve leza lakagata aseva aleko láa loko lo lekemeaká nousive: Ómasímini nasahilila lehizeleketamó nene voko haha amino. ²^m Nasahilí oleketakumú Ómasímo li gakó makó láa loko neve:

Neza gamena lamanató geí gakó gele minumóma neve.

Itó gugutó vizeaká gamenaló gelémo lamaná umóma neve. Gilinahe. Gamena lamaná itínasagó neve, itó lugutó vizeaká gamena nene ámina oko itína nene neve. ³Leza ámina oko vejená keza hoza aleaká nounikumú goseleka likatave loko monokutí velehé limita netá loló osá amune. ⁴Leza mukí netá oko moloko oaká nounike Ómasímini gelekelé ve nouni mogona ale utó moloaká nouné. Milumámini agikagú minunike, itó gasovagi netalímini amupiló minunike, itó galana netalímini amupiló minunike, geha zeakalímini agikagú minoaká une. ⁵ⁿ Segi nogosanitunú zi gililikí niago, nagá numukú minoaká unike makílisi hiziki lipilínigi akú minoaká unimóma neve. Miluma hoza aleaká unike, lovó akamunike ote minunike nosáneta ma ale ligikagú vizeko namunike minoaká unimó neve. ⁶Ligika gizopa lo minago minunike, netá mogona geleakalímini minunike, mulutejú geha zigo minunike, ligive nasahilí okimiaká unike, Sikalahuki minunike ligika lamaná oko kemeaká unimó neve. ⁷Gakó lamanakó lokunike Ómasímini zámuzá ale minoaká unimó neve. Lihimate asú olimikago minoaká nounimó nenémo gimí magete itó lagele loló okago ale minoaká nouné. ⁸Lugulizá ali otiakakú itó lovozámíni holulagú minoaká nouné. Itó legepoka loaká itó alívi letívi ilímiaká nenémini holukú nouné. Sozaló veve líki nilílitago soza lamunimó minoaká nouné. ⁹Mogonatémú vitagá niamóza, Ómasímo mogonate gele asú onoiomole. Itó heleakalímini agepaló minunitita gopa logómulagi minoaká nouné. Itó

^m 6:2 Isa 49:8 ⁿ 6:5 Apo 16:23

lipilikago hele vunimó neneta voko haha amune. ¹⁰Itó móinata mulutegú lamaná geleko minoaká nounge, itó gohogó nouhá nene gopa vejená mukí kelémo monokú henóiki vejená loló oaká nounge. Sívosávo ovunitita ligikámini henonite vaí ominamó minoaká nounge.

¹¹Kee, Koliti vejenáise, nigika nene lekelitoka napaló neve. Itó negepatunú nene gakó lo koló oko lo nolukumuve. ¹²Nénisi nene nigikatunú alévolé oko hize lé olikimiaká noumóza, lekelisi nene likigika nimiaká niamó nene lagasó neve. ¹³Lekelikumú gulugo mohóne gipáne lilí ikago, gakó imane lo likimitoze. Nenémini helega apasiki ámina iki likigikatini ali napa iki nenitoka milikiko minative loko noluve.

Ómasímini zavusave nounge

¹⁴Monó gelema vejená keza apizeko minatune liki nilikoma, lekeza lelegí oko nounge liki kilími vatí iki gehemilo. Gilinahe. Lamanalímini itó golesámini keza nana iki apizitáive. Itó lapanaki itó límugusigi nana iki apizitáive. Ma apizeminigasive. ¹⁵Itó Kilistó ezagi gala veva Sataki nene nana oko kigika hamó minative. Itó monó gele alévolé uni vejenaki monó gelema vejenaki nana oko nonagá oko minatune. ¹⁶Itó Ómasímini zavusavegi soza ómai netalímini zavusavegi keza nana iki apizitáive. Gilinahe. Ómasi alévolé oko minoaká vémini zavusave nene lélisi nene nounge. Nenemú Ómasímo láa loko lonoimóma neve:

Neza mulúiku minoko aleko inake

holutikú mohona inogo uve.

Ómasinini loló o kemekugo,

keza vejenáne zuha minanigave.

¹⁷^P Nenemú Guivahanímo láa loko lonoimóma neve:

Monó gelemamoláa ámigikimiiki apazá minalo.

Itó musi netató nene ali gelemilo.

Lá ikiko, nénisi nene gizapa oleketoko lekelémo guni inogo uve.

¹⁸^q Lá okinake ametipina nene minatove,

itó lekeza nene mohóne gipáne lilí iki minatave.

Guivahani osá amosá ve áisi gakó nene láa loko lonoimóma neve.

7 ¹Nigika lekemenou nigivese, netá nenémináámini mututoni lelémo molonoimóma neve. Nenemú musi netá nenémo ligikate itó lugupete ale golotuva loaká noi netakutí nene Ómasimú lehelele viziko ligika nagamí zeko ale mokoná lokoko gizopa lo asú iko etó oko minatunize.

Pauló kigika ali viligakumú agoliza vizimó

²Lekezatini likigikatunú gahe sigilitalo. Leza lekelitoka minusike netá golesa aleleketosá amusive, itó ve makó alémo gopa otonamusive, itó

° 6:16 1 Koli 3:16, 6:19; Liv 26:12; Izi 37:27 P 6:17 Isa 52:11 q 6:18 2 Sam 7:14; Isa 43:6; Zel 31:9

mulutikú hizeko netá matatini ma ale gopa amusive. ³Neza gakó imane mulutikú hizitive loko loleketamuve. Neza itínasa áimane lekezagi makó minoko aleko inakehe itó hilinakehe nigika lekelitoka minamó minanogo ive loko mota lo lekemekuve. ⁴Nigikatunú lekelitoka voko nogímizigo lekelémo napa oko loaká nouve. Lekeza nigikáne ali geha zi asú ikago milumámini amupiló nogoliza sipisi novizuve.

⁵Itó Taetasinimú vitagá oko Masetonia mikasigú omo anitekunike ma lavasú vizeko minamune. Neneloka lugupémini lovaváa itó ligikámini lelegesaváa nenémo utó oake lelémo vénehekánehé ligo minonouháma neve. ⁶Megusa siheleni mulúini kelémo kii lokimiaká ve Ómasi áisi nene Taetasini alémo atiginá oake mulute ale gilitoletamó. ⁷Lá oake, atiginá imó nenemukopa, lekeza mulunagú geha ziti gakó li amemó nene aleko okago, gelekusike mulutegú geha zekago nousive. Není ániganigi giliki miniaká niamó itó golesa netá utó ikumú miluma giliki miniaká niamó itó nenikumú hizi lé initiki amuza miliaká nia gakó lo nemekago, itínasa mulúnegú lamaná aleko iteko gelekuke nouve. ⁸Neza gozapá luhuva netá makó gizo lukumugo mulutikú golesa gelemó nenemú gelekuke itínasa mulúnegú golesa gelemuve. Luhuva gizu gamena nene gamena alínipáisi mulutikú golesa gilikago gelekuke, lamaná mulúnegú golesa gulumó neve. ⁹Itó itína nene mulúnegú lamaná geleko noluve. Mulutikú golesa gelemó nenemukopa, mulutikú golesa geletímo likigika ali viligakumú mulúnegú lamaná noguluve. Lekeza miluma gelemó nene Ómasímo giligo lamanalímini loló okago, gilikamole loko gakotémo ma lekelémo golesa onamive. ¹⁰Nenémini mogonamú láa loko gilitune: Monokú miluma geleaká nenémo ligika ale viligoaká netá ale utó molokiko vejená lugutó vizekiko minatune. Nenemú miluma geleaká nenémináa ale utó molatitímo alika nenemú giliko golesa aminogo ive. Itó hanuva miluma geleaká nenémo negi nagi netá ale utó molokago lapuluva iaká niave. ¹¹Ánigalo. Miluma geleaká lapa nomimó nenémo lekelitoka gihiláa lagasó ale utó molamive. Monokú lekelémo vávani oaká itó mogonatini lamaná ale utó moloaká itó golesa netá ahelú oaká sipisi itó Ómasímini mesahamú lekelegesá legeaká itó nenikumú gili guni iminiki amuza moloaká itó golesa netalímini helegáa kemeaká nene netá nenémináa ale utó molamó nene lekelitoka utó okago, lo lukumu netakumú lekélí lihima nomimó nenémini mogonáa utó okave. ¹²Gozapá luhuva netá láa loko gizo lukumumó nene golesa netá ali vema aikumule loko nomive. Itó golesa netá ale utó molota vema aikumule lokogi nomive. Gakó lo lekemekuko Ómasímini avogisalo lekeza lelitoka mulutini milatímini mogonáa utó itive loko nenemú gizo lukumumóma neve. ¹³Itó lekeza áminámini iake mulutegú ali geha zemóma neve.

^r 7:5 2 Koli 2:13

Itó mulutegú ali gililitamó nenemukó nomive. Taetasí nene lekelikumú agata gululusi nogiligo lekeza Taetasini muluna ali geha zikago, eza mulunagú agila guluma noigo, ámina gako nene geleko lagaváa gulunimóma neve. ¹⁴Neza gozapá Taetasí nene lekelitoka vinogo noigo lekelémo napa oko gako lo amumó neve. Itó lekelikumú gako lo amumó nenémini gihiláa utó o asú imó neve. Neza Taetasini gako nene sozagi ma lo lekemesá amuve. Ámina oko lukugulizá ale oteko Taetasini lo amumóma nene ma gihiláa loló onoiómoma neve. ¹⁵Taetasí nene lekelitoka vokago, lekehelele viziki ininá iki mulutini milake nasahilí itamó itó gako láa gili alemó nenemú geleake agika lekelitoka molamó nene napa neve. ¹⁶Neza lekelikumú gulumó netá matatini hee lokogó nego, mulúnegú golesa amigo vatí oko minanogo uve. Nenemú mulúnegú lamaná geleko luhuva imane gizo nolukumuve.

Monokumule loko moni ali nupa ita gako

8 ¹ Nigivénegita, Masetonia mikasiuka monó gele vegeatoka Ómasímini nasahilí nenémo gihila ale utó imó nenemú lo likimitoze, gililo. ²Keza miluma maluma nenémini agikagú minake gohogó minamó nenémo ha netá loló okago, gopa nene monolímíni kogolizaváa nene itiki alinake mulúikú lamaná geleaká netá nene vegeaná makó kimitune liki moni ali nupa amó nene komasí nomive. ³Neza keí mognatagana gele hee loko gelenouke nolumó nene lá oko neve: Kezáini kagata giliki vávani iake moni ali nupa amó nene kezáini moni milamó nenémini lelegító milamake aviligiki milamó. ⁴Lá iake neza kagata aleko lá amugo, kezáini geleke gala vizilitake Zelusale numutoka Ómasímini vegeinatini mulúikú lamaná gilita netá ali utó miliki kilími vatí inigi moni aleko voko kimitane liki negénegeka lamó. ⁵Lá iake, netá lagasó inigi lahe loko noguluko ganá nene Guivahaniloka kigika mili gilitiake Ómasímo lititoka molatitoka itune liki liake lezalokagi kigika mili gilitiki minamó. ⁶Keza nenémini ikago, Taetasí nene ámina hoza apí i ve nene lekelitoka vooko lekeza likigika kimita hoza nenémináa ali asú itave loko gala vizunimó. ⁷Itó gele alévolé oakatini itó monó loakatini itó gako mognáa gele hee loko geleakatini itó monolímíni hozavamú amuza moloakatini itó likigika lemeaká nene netá nenémináamini gihila mukí ali utó miliakeve loko ámina mulutikú lamaná geleaká hoza aliiki moni ali nupa itakumú lekeza ámina iki vávani itave loko noluve.

⁸Neza moni ali nupa itakumú gala vizeleketoko loleketamuve. Monó geleaká vegeaná lugáaloka ámina hozamú vávani ikave. Nenemú lo lekemekugo lekelí nasahilílmíni lelegiláa nana oko neve, nenémini mogona utó itive loko noluve. ⁹Lekeza Guivahanite Izesu Kilistoni

* 8:1 Lom 15:26

nasahililamú mota giliaká niave. Eza minumuni izolaho lekelikumule loko gohogó ve loló imó nene lekeza áminatunú monokú minumunavagi lilí itave loko nenémini imó nenazo, Izesuni agizaka hiziki mihina itave loko noluve. ¹⁰Itó gako makó láa loko nogulumó nene lo lekemekugo, gili alikiko, gihila utó itize. Lekeza nene litaha meleketó lekezatini litá iki moni ale nupa itune liki liake vávani iki ámina hoza apí inamóma nene itína ámina lelegitó ali asú itamó nene lamaná inogo ive. ¹¹Nenemú vávani iki apí amómáminiki miní amiki aliliki niviki vávani iki ali lutigitamó nenémini gihiláa nene moni milinita lelegitó ali utó milalo. ¹²Mulutikú lamaná giliki moni milatamó nene Ómasímo gelekiko lamaná inogo ive. Leza molonamuni lelegitó negopa, netá molunouni lelegitó molokuko Ómasímo áinigago lamaná oaká noive loko noluve. ¹³Lugáate mulúikú lamaná gilitave loko moni ale nupa oakakumú nene lekeza mikasi lukugupegi miniki lukugupeló gilitave loko nomive. ¹⁴Lekelí minumunímo itínasa gamena nene keí gohogó amiselekiko, netá matáini nomi vegealite netá makokumú vitagá amitave. Itó minoko gamena makó zupahé keí minumunímo lekelitoka gaúna gamena amisilitive. Lá okiko nene kezagi lekezagi hamó lelegitó mini miliki minatave. ¹⁵^t Gona miliki kimimi vakumú nene monó gotolaú gako lá oko nemóma neve:

Mukí netá gizaká a vegealitiníni minumuníni napa nomimó neve.
Itó lagasó ali nupa amoláate gaúna helemamóma neve.

Taetasige monó moni aliki vita gako

¹⁶Ómasi eza lekelémo vatí itikumú nene Taetasini alémo zaú okago, lekelikumú nagata geleaká umó ámina avevezahaló aitoka utó okago, Ómasi agepoka loaká nouve. ¹⁷Neza lo amekugo geleneive loko nomive. Ezáa agikámo vávani o lamaná okago núane lekelitoka vinogo ive. ¹⁸Guivahanímini vegejala zuha mukitoka keza Izesuni gako lamanakumule loko hoza aleaká noi vemú gili lamaná iki giliaká nia ve ezagi makó amiselekugo núane nivasive. ¹⁹Itó ámina vémini gakola makó lá oko neve: Guivahanímini vegejá keza ámina ve nene mulúikú lamaná gilitave loko ali nupa ina moni aleko novuko, neneló kelémo vatí iko, makó vitave liki alími etó amó. Ámina hoza nene Guivahanímini agulizá otitive loko, itó mulutegú vávani igo hoza nalunimó nenémini mogona utó itive loko alinogo nune. ²⁰Nenemú gopa gako makó utó okative loko sipisi moni nene legesó iki gizapa itave loko kimiselekugo nivasive. ²¹Lá nounimó nene leza netá loló okuko Guivahanímo ezagó gelekiko lamaná itive loko negopa, mukí vegealite gilikiko lamaná itive lokogi nalune.

²²Neza nene ámina ve lositaki itó ligive makoki nene kimiselekugo núane nivaze. Ámina ve eza nene mukí zupa gimivagú moloko áinigokuko

^t 8:15 Gá 16:18

vegená kelémo vatí itikumú amuza moloakalímini mogonáa utó okave. Áisi nene lekelikumú giligo, alévolé okago, amuza napa nomolave. ²³Itó Taetasini mogonamú gilitune liki nilikoma, lekelikumule loko ezagi nezagi hoza aleaká ve losi nene nousive. Itó Taetasigegi makó nivasi vetini mogonáinimú gilitune liki nilikoma, keza monó gele vegeináini zuha nenete kimisilikago núane nivasive. Itó keza Kilistoni lapaná ali utó iaká nia ve niasive. ²⁴Neza lekelémo napa oko lo nokumumó nenémini gihiláa utó itive liki lekeza ámina ve nene viki anitikiko nasahilí ikimikiko, monó gilina vegeiná lugáa numutó numutó keza gili guni itave.

Zelusalega monó vegeinakumule liki moni ali nupa a gakó

9 ¹Zelusalega Ómasímini vegeiná nasahilí ikitiki moni kimita gakó nene mota gilinave. Nenemú nanave loko goha gizo likimitove. ²Ámina hozamú mulutini hukili okago, gelekuke, lekelémo napa oko lekelí mogonamú láa loko lumó: Akaia mikasiuka monó nigele vegeiná lekeza litaha kilisimasiló litá iki vávani iake moni ali utó moloaká gapo ali utó amó nenémini gakó nene Masetonia vegeiná lo kemekugo, vegeiná lugáate keza amuza miliki gakotini giliake, ámina hoza alitune liki mulúikú lamaná gelemó. ³Neza ámina hozamú lekelémo napa oko lo kumu gakó nene voko hetagá okative loko neza lumómalo nene áminaló miliki vávani iki moni ali nupa itave loko ámina ve losive makole kimiselekugo nivave. ⁴Nezáne alika Masetonia vegeniki vokuko, lekeza moni moloakakumú ligitagani ikikoma lekelémo napa oko lo kumu gakóne alemó zekiko, nezagi itó lekezagi lovoza helekative loko ⁵nenemú neza gulumó etokago, nigive nagave imane gala vizeko kimiselekugo, goí iki lekelitoka núane nivave. Vi anitikiko, lekeza moni ma kimitune liki emane amunaló gakó li hukinamóma neve. Nenemú ganatilisí ali nupa ikiko minatize. Lá ikiko, neza lekelitoka vo anitekinake gala vizé vizé ugo moni milatamó negopa, mulutikú lamaná gili minake moni milinamó nenémini mogona lamaná utó okiko ángatove.

⁶Itó moni ali nupa itakumú anoza gakó imane láa loko noluze, gili minalo: Leza zuha netá koma zuhá itunimó nene minoko komagó alinogo une. Itó zuha netá mukí zuhá itunimó nene minoko mukí ale minanogo une. ⁷Nenemú imanémini itaze. Lekeza etó etó iki likigikatunú giliki gili guni iniki gilita avotigiláminiki nene moni ahulataze. Itó kogoliza viziki monó moni ahuliaká nia vegeinakumú nene Ómasímo ángo amu heleaká noinazo, gínikahavagi neiko vegenalite gala vizí vizí agogopa, mulutikú lamaná giliki ahulataze. ⁸Ómasi eza minumunavagi ve noinazo, vávani oko lusa nene lukumupiló molokiko minumuni utó o likimitize. Lá okiko, lekezatini ni lakagatupa niiki vegeiná nasahilí ikitata hoza haitopaitolímini alitune likima netá makokumú ma vitagá aminigave. ^{9^u} Monóinigi vegenalite lá itakumú nene monó gotolaú gakó makó láa loko nemóma neve:

^u 9:9 Age 112:9

Keza gona miliki gohogó vejená nasahilí ikitake kimiaká niave.

Keí nasahilíini huko vaitimó minoloko voko minanogo ive.

¹⁰ Ómasi eza zuha netá ale utó mololimikago zuhaina oaká nounge. Itó gihiláa ale utó mololimikago minoko aleko oaká nounge. Lá oaká noinazo, eza nene lekezagi minoko zuhaváa ale utó mololikimioko lusa geko ale napa okiko, nasahilitinímini gihiláa mino hutilí oko minanogo ive.

¹¹ Itó haitopaitolímini oko minumunitinigi vejená lilí iiki áminatunú vejená makó nasahilí ikimikiko, nasahilitinímini gihiláa utó okiko, keza lelikumú Ómasi agepoka litamómámini mogona lá oko neve:

¹² Lekeza Ómasímini vejenala zuha mulúikú lamaná gilita netá lilí iki moni kimikiko, nenémo gohogóini amisele ahuloketative lokogó negopa, nenémo Ómasi agepoka loko geké lomiaká nenémini minumuníagi ale utó molotative. ¹³ Lekeza Kilistoni gakó lamaná giliake ali gikitiki ali miniaká niamó nenémini mogonáa, itó lekeza Zelusalega monó gele vejená itó likigive lugáa mukitoka kezagi nene mulutikú lamaná giliki napa iki nasahilí ikitamó nenémini mogonáa utó okiko, Ómasímini lapaná utó o lamaná oko minative liki ali otinigave. ¹⁴ Lá ikiko, Ómasímo nasahilí haitolíminoko lekelitoka ale utó imómave liki kigika lekelitoka miliki lekelikumú Ómasiloka linigave. ¹⁵ Itó Ómasi eza nasahilí oletoko gipala lehizeletamómámini mogona lo asú oko lo utó o asú amoakalímini nenemú hanuva sigaga lotoko agepoka litune.

Pauló ezáa mogona hize lé imó

10 ¹ Neza Paulona imane Kilistoni zou nagamilagi itó nasahililagi noukeve loko lakagata aleko lo likimitoze, gililo. Lugáate nenikumú láa liki liaká niave: Lelitoka oko minake ezáa amuzavagi ve minamike, gakó nagamilagi lo lemeaká imó. Lá oake, voko minake agokagutí gakó lo lemeaká noive liki liaká niave. ² Nigive nagavese, lekelitoka voko mininake vejenalite litaha kigikatunú aliaká niamómáminoko hozava aleko minoaká noive liki nenikumú liaká nia vejená nene nogokagutí gakó lo kimitove loko nene vávani oko lo kimitomóza, lekeza lugáa ámináminoko nogokagutí lo lekemekatoze, gala vizemilo. ³ Lelí mogona lá oko neve: Mikasiuka netá matate ale minunike litaha lugupegi lamaná mohona nouhá nemóza, monokumule loko lova hizeaká nouhá nene monó gelema vejenalite litaha kigikatunú lova hiziaká niamó nenéminoko nomive. ⁴ Gimisi magé ale minunike monolímini lovavagú hoza aleaká nounimó nene mikasiukatí monó gelema vejenalitini netatunú negopa, Ómasímini zámuzalagi nounike nenetunú gala veletini ha gakóinímini vegegisa tele vizeaká nounge. Itó keí zamuza zeko letokuko niiko, ⁵ Ómasímini mogonáamú gele guni oaká

^v 9:10 Isa 55:10

gapo hizi lí inigi govisi aliki letiaká gakoíni apelekunike, vasá zeaká netá ali utó iaká niamó nene avilegeaká nounge. Itó Kilistoni gelegeleláagó utó itive loko haitopaitolímíni lagata geleaká netá nene nagá ameaká nounge. ⁶Lekeza není gako gili aliatatini vávani i asú ikiko, leza vejená lugáa gako pelesa ziaká niamoláa nene nakahuni kimitune loko gizapa onounge.

⁷Není mogona lokovogisaló utó noimó nene ánigalo. Lekelitokatí ve makolímóhe makolímóhe ezámú gelekiko Kilistoni vejenala zuha loló okamó áisi láa loko gilitize: Ezáagó Kilistoni vejenala ma nomive. Lezagi Kilistoni vejenala nene nousive. ⁸Guivahanímo hozavamú gilike zámúza nimimó nene lekelémo lapuluva oakakumú negopa, hize lé olikimiakakumú nenazo, neza ámina zámuzamule loko nugupe aleko iteko lo likimitomó nene novoza helemínogo ive. ⁹Itó luhuva netá imane gizo nolukumumó nene, nenemú giliko lekelegesá ligiti gako gizo nolukumumó gelemíno. ¹⁰Nenikumú láa liki liaká niakumú noluve: Luhuva netakú gako golivagi itó alévolekutí gizoaká noimóza, lovogisaló nene amúza ve minamive. Itó hutuváa gako loaká noimó nene nagamílagi loaká noive liki liaká niave. ¹¹Némika liki liaká nia vejená keza hotó minuke luhuva gako gizo lekemeaká noumó nene áminámini gihiláa hamó lelegító nene holutikú minoko ale utó molokugo ániganigave liki gilitize.

¹²Neza vejená kugupe aliki iti iti iki miniaká nia vejenatoka gímizekinake lelegí nounge loko litohe. Íi, keza není lelegító ma minamave. Vejená nenémináa keza Ómasímo oko moloko oaká nounikumú nanave loko nogilive liki lamake, gako gona miliki liaká niamó nene kezáini mogonáinimukó gili minake gako gopa kezáini mogona lotuva ligiaká niave. ¹³Neza Ómasímini hoza alitane loko lehizeneta lelegító nelémo etó imó nene ámina oko aluke, lekelitoka anitumó nenemú gelekuke alemo ite ite gako losá amuve. Itó lehizeneta lelegító gopa avilegeko ma losá amuve. ¹⁴Neza hozanegó lelegí oko aleaká nounge. Hoza lakanite nene lamaná lekelitoka neimó nenazo, leza nene lekelitoka anituko lelí legepagutí Kilistoni gako lamaná ganá apí iki gilinamóma neve. ¹⁵Leza vejená lugáatini hozagú lagakilímó oko moloko leza alunimole loko lugupe aleko iteaká gako loaká nene ma osá amune. Gele alévolé oakatini nene agizani alekiko leza lekelitoka voko hoza lakanite ale napa itune loko nenemú ligika nego minoaká nounge. ¹⁶Lá okinake lekegemesaloka mina mikasigú vejenatoka gako lamaná lo utó oko lo kemekinake, ve makolímíni hoza lakanivagú ezáa ale utó ikumú lugupe aleko iteaká gako loaká nene ma amitune. ¹⁷^w Lugupe aleko iteakakumú nene monó gotolaú gako makó lá oko nemó neve: Makó eza netá matakumú aleko ite ite gako litove loko nookoma, Guivahanímo oko moloko i netakumú gele minoko lino. ¹⁸Makó

^w 10:17 Zel 9:24

ezáa agupe aleko iteko nolikoma nene, monó hoza lamaná alekave loko lamitune. Guivahanímo alémo napa okago gihiláa loló okave loko litune.

Paulogegi soza aposolo vegi keí gako

11 ¹Gakó lagasó makó lo nolukumugoma negi gako lokave liki goselé lekepelemino. Hanuva legesó iki gililo. ²Neza lekelikumule loko Ómasímo lekemekugú noaká noimómáminoko amuza moloaká nouve. Lekeza ve aleve suni ánigonami mohó vové aveláa nenéminiki niko, ve hamotokó vitave loko anosa mololeketumó nene Kilstó noive. ³^x Lá onoimóza, gosihalímo logoka vizeakalímíni mogonamú gele hee lo minake Evani nene soza gaktunú agoka vizimó ámina oko lekezaloka ve lugáate lokogoka vizitakumú geleakatíni golosasa gekiko, vové avé liki Kilstonimukó giliaká niamó nene ahulikatave loko gulugo, gena noigo noluve. ⁴Nenémini mogona lá oko neve: Lekelitoka vejená makolímó aniteko Izesuni mogonáa lélisi lo lekemeaká nouhalímíni negopa, ametameni haitolímíni makó lo lekemekago nene, itó gozapá lelitokatí alemó nenegopa, haitolímíni gosohá gako lo lekemekago nene, itó Izesuni gako lamaná lelitokatí gelemóma nenegopa, monó haitolímíni makó lo lekemekago nene, géneka li amemiki hanuva gili amiaká niamó nene lamaná noihe. ⁵Nezáne mogonamú gelekugo ve napa nune liki liaká nia aposolotini sepenauka nominumó gelesá amive. ⁶Neza negepa gúmusi muluke lo lekemeaká nouhe loko gelenamumóza, monolímíni mogonáa geleaká nene gelenouve. Itó nenémini mogonáa haitopaitolímíni oko ale vesamá oko lokovogisaloka ale moloko lo lekemeaká nouve.

⁷Itó lekelí lekelémo napa itove loko nezáne lemeko minuke Ómasímíni gako lamaná lo lukumutó meinaváa ma alesá amumó nenémo golesa ihe lamaná ive. ⁸Lekelitoka monó hoza aleko gelekelé noleketuke Ómasímíni vejenala zuha lugáate moni henoni nimikago aleaká umó nene hagitana ipá oaká umó gelekave. ⁹^y Itó lekelitoka minuke netá makokumú vitagá uke voká makó loleketamumóma neve. Neza vitagá oko mohona nougo, Masetonia mikasigutí nigive makolite aniteke netá nimiki ali negepa miliaká amó. Lá niago lekelitoka nene hanuva minuke genavagi netá geheleketonamumóma neve. Itó minoloko iteko gohagi geheleketamitove loko noluve. ¹⁰Kilstoni gako gihiláa nigikauka nego lamaná noluve. Ámina suni aleaká noukumú nugupe ale napa otigí oko loaká nou gapo nene Akaia mikasigú lekeza nia mikasiuka hizi lí aminigave. ¹¹Nene nanamú noluve. Nigika lekememuke lá oaká nouhe. Nenémini oko nomive. Nigika lekemeaká noumó nene Ómasímo geleneigo noluve.

¹²Netá aleaká noumó nene ale-loko voko minanogo uve. Itó nene hanuvamukopa, vejená lugáa keza Pauló hoza aleaká noimó nenémini

^x 11:3 Apí 3:1-5,13 ^y 11:9 Pili 4:15-18

lelegitó oko hoza nalune liki kugupenini aliki itikatave loko nene lukesaváini akeleaká nouve. ¹³Ve nenémináate aposolo sozámíni itó monó hoza sozámíni aliki minake, Kilistoni aposolo lelí lemetamenigitana lílí iaká niave. ¹⁴Lá ikago netá haitolímini makó alikave loko litupe. Lá oko nomive. Satá ezagi nene ageló vejená lapanáiki loló itove loko ali tolova oaká noinazo, ¹⁵nenemú Satani hozaváa aliaká nia vejená keza ámina iki netá lamaná aleakalímíni gelekeleláa loló itune liki kezáini kogoka kegepa vávani iki ale tolova iaká niakumú ininá amitune. Keza miniki hoza golesa aliaká niamó nenémini helegáa alinigave.

Pauló aposolo hoza alike miluma gili gakó

¹⁶Gakó nolumó nene goha litoze. Nenikumú gelego negi ve liki loló amino. Gopa nenikumú láa liki nigilikima gili nimíkiko nugupe lagasó ale napa otigi oko litoze. ¹⁷Neza gakó láa loko litomó nene Guivahanímo lonetamómámíni oko litogopa, hanuva nugupe aleko iteko gakó apí okumole loko gopa nene negi gakó linogo uve. ¹⁸Vegená mukilite lugupémíni netakumú ali napa napa iki gakó liaká nianazo, neza ámina oko litove. ¹⁹Agae, lekeza netá mogonáa geleaká nouni vejená nune liki likamó nenazo, lugáate negi gakó li likimikago, vávani iki giliaká niave. ²⁰Itó likilími gelekelé izegipatini milanigi niake, itó netá matatini ipá iki nanigi niake, itó gelehusíki apilitave liki niake, itó kugulizaki ve lílí i likiminigi niake, itó lokogoka lekegepaló zinigi niago, nenemú lekeza gahá kememake gili kimiaká niave. ²¹Neza nene sunimú amuza molamugo lekeza lovoza heleaká netá nalive liki nilahe.

Makó keza netá nemupe manamupe ahuu ahuu liiki nene alune liki ma niko, nezagi nene negi vegitana oko nehelele vizemigo nugupe aleko iteko litoze. ²²Ámina aposolo sozámíni nene kezáinimú Hipulu ve nune liki liaká niamóza, nezagi ámina oko Zuta ve nouve. Kezáinimú Isilae vejená nune liki liaká niamóza, neza ámina oko loaká nouve. Keza goha ámina iki kezáinimú Avalahani agapilamola nune liki liaká niamóza, neza áminaló kémegetoko loaká nouve. ²³^z Keza Kilistoni gelekelé veva nune liki liaká niamóza, neza imane gopa negi nagí gakó litoze. Neza kivilegeko Kilistoni gelekelé veva haitolímini nouve. Neza hozámíni milumaváa geleaká noumó nene haitolíminoko neve. Itó monokumule loko nagá numukú minoaká umó, itó segi nogosanitunú nipilikago nagavú geaká imó, itó lapuluva itove loko geleaká umó nene haitó avevezahaló iteko neve. ²⁴^a Zuta ve keza gamena ligizani lugaloka asú igo uheni nakahunitunú nepelemó nene 39 igo nepelemó. ²⁵^b Gamena losive makole Loma vete segi nogosanitunú nepelemóma neve. Itó gamena hamó nene gehanitunú nipilikago hilinogo umóma

^z 11:23 Apo 16:23 ^a 11:24 Gapo 25:3 ^b 11:25 Apo 16:22, 14:19

neve. Itó gamena losive makole nagamikú lapegú nougo ámina sipi zeko ategekego age nagamikú lemesá umóma neve. Itó gamena hamó nene sipima golesa okago límugusi zeko gó loko imóza, simá namoko hanuva age nagamí amupiló minumóma neve. ^{26 c} Itó gamena mukí nene gapo hána hána vova vova oko mohona oko nominugo, golinímo nagamilímo okago lapuluva osá oko minoaká nenémini amupiló iteko minumóma neve. Itó laskoli vetini holúikú heleakalímini amupiló minumóma neve. Zuta ve nigivénegini holúikú itó Zuta ve minamamoláatini holúikú heleakalímini amupiló minumóma neve. Taoni napagú itó gihisigú heleakalímini amupiló minumóma neve. Age nagamikú nene sumizá noaká avevezahaló, itó monó sozaló ve ligivetegini holúikú heleakalímini amupiló mohona oko minumóma neve. ²⁷ Génopa hoza alekuke nigizamuha nagavú gigo mohona uke, novoki ako lamaná amumó mohona uke, gaúna heleko zahí nagamikumú nivisigo, hepé heleko minumóma neve. Gineganemú itó avilisakumú vitagá oko minumóma neve. ²⁸ Itó nenegó ma nomive. Gamena gamena mulúne gitihiná igo numutó namató Guivahanímini vejenala zuha gizapa okimiaká hozamú gulugo, gena nivisigo minoaká nouve. ²⁹ Makó keza monokú ipú zemagoma, nezagi miluma gelekimiaká nouve. Itó makó keza monokutí olíi hizikagoma, milumaváini geleká nouve. ³⁰ Itó neza netá makokumú nugupe ale napa itove loko nookoma, keé lamumó nenemú ale napa oko nolugo lamaná inogo ive. ³¹ Guivahani Izesuni amelaho Ómasía luhuva gegemá oloko voko mino lúaló molati ve áisi nene nenikumú lamaná nolive loko geleneive. ^{32 d} Neza Tamasiko numutoka nougo, agulizakí ve napa Aletani kiapelímo nagá numukú nelémo molanogo lokago, numuni gatekú gohoni akamó. ³³ Lá niago, nigive nagave keza nene gosúvehagú lohosi iake vegegisa koló o minakú nehelú i ahulikago, olífo hetoka lemekuke golisi vumó neve.

Pauló agika ale viligokago ániga gakó

12 ¹ Lugupe ale napa ituni gakó losá nene ma lelémo vatí amitimóza, gopa nene litoze. Nigika ale viligokago netá ángumó itó Guivahanímo lo vesamá oko lo nimimó nenemú itínasa aveté oko lo likimitoze, gililo. ² Neza Kilistoni vejenala makó gelenouve. Eza nene netá makó ániga gamenalotí kilisimasi 14 oko vokave. Ve eza nene Guivahanímo galinali alémoko okulumakú itekago velé amupiló agika nekú nene itimó. Neza agupegi nehe itó agupe gileleake nehe nene gele hee lamuve. Ómasímogó geleneive. ³⁻⁴ Itó Guivahanímo ámina ve galinali alémoko itekago, Palatisi zazuahagú nene iteko gakó legepatunú lamosá itó mikasiuka veta lo utó moloko lamosá nene gilimó. Neza gelenoumóza,

^c 11:26 Apo 9:23, 14:5 ^d 11:32-33 Apo 9:23-25

agupegi minake itihe itó gileleake itihe nene nénisi gelemuve. Ómasímogó geleneive. ⁵Ámina vemule loko nugupe ale napa oko gakó litove loko nene nezáne mogonamú hize lé oko laminogo uve. Nezanemú litove loko nene keé losá amumó nenemukó ale napa oko linogo uve. ⁶Nugupe ale napa oko gakó litove loko nelina nene, gakó lamaná lulinamó nenazo, negi nagi ve minamuline. Lá onoimóza, nenikumú gelego itekative loko nene ma laminogo uve. Netá matá lokugo itó oko moloko nougo, lekezatini áinigiki mota giliaká niamó nenémuni lelegitó minanogo ive. ⁷Okulumakú netá gosohá áinigoko moloko umó nenemú nugupe aleko itekatove loko nugupéne mémelagú emane uhenagi netá makó hizimó nene, Satani gelekelé izegipala makó eza nigikatunú gulugo itekative loko agizani lapuva nimitive loko lonoimóma neve. ⁸Lá okago, ámina netalímo ahulonetative loko Guivahaniloka gamena losive makole lumó neve. ⁹Voká lokugo, láa loko lo nimimó: Není helisánémo keé losá amanikú nene napaló hize lé ogimiaká noinazo, není nasahílnémo geitoka veleko voaká noigo, netá makokumú voká litanimoláa nomive loko lo nimimó. Nenemú Kilistoni zámuzalámo nenitoka nelémo gilí litive loko keé losá amumó nenemukó ale napa oko noluke nogoliza vizeaká nouve. ¹⁰Lá onoinazo, neza keé losá amutó nene aitoka leheta nouke amuza moloaká nounazo, Kilistikumule loko keé lamugoma, itó alivi letivi ninitagoma, itó miluma malumámini amupiló nominugoma, itó gopogunímini itó galáinímini amupiló nominugoma, gopa nenemú mulúnegú golesa gelesá amuve.

Pauló Koliti vejenakumú miluma gilimó

¹¹Imane negi nagi gakó lumó nene lekelisi iki miliki amó nenémo nelémo zaú okago noluve. Lekezatini nilími napa ikiko lamaná itinazo. Neza hanuva ánéámina noumóza, lekelí aposolo iteko noune liki nila vetini kamakuka lemeko ma minamuve. ¹²Neza lekelitoka hoza huluváa alugo, alévolé suni itó gosohá netá zámuzagi ale utó oaká umó nenémo aposolo mogonáne ale utó moloaká imó. ¹³Itó lekeza nanetá vitagá iake Ómasímini vejenala zuha mulusi lugáatini avevezahaló minamave. Lekeza netá hamotunukó lekelémo alínipa okuve. Netá matatini visele nómonó nene ma oleketamumóma neve. Ámina suni nene lihima napagi nego ahulinitalo loko litohe.

¹⁴Neza lekelitoka gamena lositá vumóma neve. Itó itína nene goha vitove loko ale vatí nouve. Vinake goí oko vuke nugupémuni lukesaváaloka umómáminoko miluma hoza lekememinogo uve. Izegipa koma nenete izóikini améikini hizi lé ikitanigi moni ali nupa isá amave. Kéisi izóike améike hizi kegepa itakumukó giligili miniaká nianazo, neza lekelí moni henonimú negopa, lekelikumule loko amuza moloaká nouve. ¹⁵Neza nene lekelikumule loko moni henokanóne itó minoko

aleko oakáne nenegi nuwane ahulatove loko vávani oko nouve. Nenemú nigikatunú lekelikumú geleaká noumó nenémo aleko iteko noiko, lekeza likigikatunú nenikumú giliaká niamó nenémo aleko lemeko minatihe.

¹⁶Vegená lugáate nenikumú láa liki liaká niave: Ezáa netá utó ezo azoga loko ipá oaká nene ma osá amimóza, asugunatoka vegená kogoka vizeko netá matáini ipá oaká onoithe liki liaká niave. Olile, neza lá umó nehe.

¹⁷Nenemú lekeza lilo. Není gakató nene vegenáne zuha kimiselekugo, viki netá makó lekelitokatí ipá ikahe. ¹⁸Taetasini nene vitive loko lotumó, itó monokú ligive makó amiselekugo makó vikasigo nene, Taetasí nene voko lekelitokatí netá matá ma ipá ihe. Leza ligika molo hamó usike gapo hamotó lisoko makó vamusihé.

¹⁹Gakó akó loaká noumó nene lekeza gelego ezáa mogona hize lé oaká nolive liki nilahe. Nenéminoko nomive. Neza Kilistoni izegipala minuke Ómasímini avogisaló gakó loaká nouve. Itó nigive nagavese, gihila nenikumule loko lamuve. Monokú lekelémo kii litove loko loaká nouve.

²⁰Neza lekelitoka voko ánigoleketatomó nene lekelikumú gulugo hehe lamitive loko, itó lekeza nenikumú ámina iki giliko hehe lamitive loko gulugo, gena nonivisive. Itó lekelitoka lova leta lava leta itó lekemekugú noaká, mesaha kosaha, itó molo alata alata oaká, itó alevo letovo oaká, lotoka lataka hizeaká, vegená kugupe aleko iteaká, ale gopánapa oaká, netá nenémináa neko voko ánigokatove loko gulugo, gena nonivisive.

²¹Lekelitokatí lugáate emane amunaloka likigika golotuva lamó mokoló netá itó musi netá likigika napaló nego, némini manámini ake likigikatini makó ali viligisá amiki nenéminiki niko, lekelitoka vo anititomó nene lokovogisaló Ómasinémo nelémo-loko lemekiko, lekelí lihimamú mulúne gitihiná okative loko gulugo gena niviseaká noive.

Kagata alike geké loketake gizo asú imó

13 ¹Itína lekelitoka goha vokugo gamena losive makole inogo ive. Goní oaká gamenaló nene ve lositá ahe itó losive makolehe keza ve makolímini lihimamú likiko utó o lamaná oko vevesanogo ive liki monó gotolaú gizina gakó nene, lekelitoka vo anitekinake ámina gakó gele mininake gakó linogo uve. ²Amunaló emane lihimatinigi minamoláa itó vegená lugáa nene lekelitoka gamena losi vu zupahé lakagata aleko lu gakó áminama nugupe hotó onoigo goha imane noluve. Alike goha nene voko aselini ma zeleketaminogo uve. ³Kilistó nene nelémo vávani igo loaká noutímini mogonamú lekeza vitagá niamó nene ániganigave. Kilistó eza lekelitoka hozaváa nalimó nene nekisáa nomimó neve. Zámuzalagi aleaká noive. ⁴Gozapá nene lamaná migelelé onoigo zohota zaló apelemóma nemóza, itína nene amelaho Ómasímini zámuzalagi

^e 13:1 Gapo 17:6, 19:15

aleake otimó neve. Neza ámina oko eza imómáminoko migelelé ovumóza, aitoka gímizekuke Ómasímini zámuzaló voko leheta oko minoaká noumó nenémimi mogona lekelitoka voko ale utó molanogo uve.

⁵Lekelisi nene lamaná monokú niahe niahahe nene likigikatini loká iki vitagá iiki nenémimi mogonáa ali utó milalo. Itó Izesu Kilistoni mulutikú alími milikago nominamó nenémimi mogona mota gilinahe, olile. Itó lukugupémo monó avevezaha oaká noihe. ⁶Nénisi nene hetó nugupetunukó monó ve ma minosá amuve. Lá nougo ángatave loko geleaká nouve. ⁷Ómasímo gizapa olikimikiko lihima ali utó milamitave loko Ómasiloka loaká nouve. Lekeza ángigikiko monó ve gihiláa loló oko minatove loko nomive. Lekeza monó gakó gili alitamó nenémo utó o lamaná itive loko noluve. Itó nenikumú nene agupetunukó monó ve noive liki gilitamó nene ha netá neve. ⁸Leza nenémináate nana oko gakó gihila lova ale amitíive. Hanuva hize lé otatíive loko nousive. ⁹Leza zámuzamú vitagá okoko nousigo, lekelisi zámuzatiki minatamó nene mulutegú lamaná gilino go usive. Lá nousike likigika gizopa lative loko Ómasiloka loaká nousive. ¹⁰Guivahanímo zámuzá nimimó nenetunú lekélí lekehelú itove loko negopa, lekélí lekelémo alévolé itove loko nemeneimóma nenazo, neza lekelitoka voko alévolé gako kutí lo lekemekatove loko ganatilisí hotó nouke lakagata aleko luhuva imane gizo nolukumuve.

¹¹Itó nigivénegita, gakó lo asú oko láa loko litoze: Lekeza mulutikú lamaná giliki minalo. Itó lakagata aleko gakó imane nolumó giliki likigika ali guni iki alími lamanatoka milalo. Lá níiki lekeza likigikatini mili hamó iki hulugú minalo. Lá ikiko, Ómasi eza ligika kemeaká itó hulu amelaho lekelitoka minanogo ive.

¹²Lekeza monokú eza aputá viziko eza aputá viziko iki minalo.

¹³Imaneloka monó gilina vegealite mukitó geketini lilikimiaká niave.

¹⁴Guivahani Izesu Kilistoni nasahilila nenémo itó Ómasímo agika lekemeaká noimó nenémo itó Sikalahulímo lekélémo apizeaká noimó nenémo lekelitoka minoloko voko minino.